

懷寧縣志卷二十一

隱逸

隱非徒隱也自晦以樂其道違人以潔其身故道隱之謂賢人身隱之謂隱者世弗察其隱之實至於不挂仕籍之人概目之以隱則隱亦輕矣懷志所傳隱逸以之希風太古誠不知其何如然率其偏介之性以遂獨往之概彼志有所徇與義有所激詭時審已以成其道抑豈苟焉而已哉視夫無具以藏拙借徑以梯榮者不其遠而

明吳崇洙字惟孔諸生隱處讀書不問戶外大宗伯李維楨過皖聞其賢詣門請見崇洙堅匿不出宗伯趨入臥內得盡所懷而去年八十四卒著有消夏塵談雙桂堂迎暉閣諸集

顏從喬字若齡府丞素子性恬淡愛豹嶺林泉之勝遂終身焉嘗作隱士詩自况一云太璞既彫鑿時風寧再淳逶迤共馳逐一失莫能援達人秉玄鑒動微機已分翻然斂修翮林麓返吾真出隨灌園子閒依壟畝民軒羲固云邈玄漠豈無存同時有倪爾嘲方應賓亦嗜古深於詩隱治塘山中與從喬爲世外交從喬著種秫齋詩集又耽內典有僧世說若干卷

任之燦字弢伯大參國楨子爲諸生時與宮詹劉若宰侍御汪游龍明經方都韓齊名明季避地金陵福藩監國時有許以清華一秩者之燦退而嘆曰國家內患外憂時事若此江南不可

爲矣亟奉母歸聞左師叛預陳防江守城分兵措餉諸策於撫軍時不能用乙酉四月城潰之燬間道奉母入山大兵平江南六月傳檄至皖之燬泣曰滄桑之變不意吾身親見之越日晨起肅衣冠北向拜畢端坐而終祀鄉賢子竣塾壩垣堡別有傳劉若宜字宜之布政尙志子崇禎丁丑進士授刑部主事遷兵部職方司員外郎時流寇猖獗蹂躪六皖若宜上疏曰臣鄉安慶府之懷寧縣地屬江北首隸郡城陪京咽喉江南屏蔽夙號魚米之鄉自丙子丁丑以來流寇披猖殆無寧歲如河南諸寇則由光固走舒桐而至湖廣諸寇則由麻黃走潛太而至無日不遭蹂躪無處不成污萊樂土爲墟民不聊生矣然近郊一二

十里猶得乘間而事耕穫也至戊寅己卯而後飛蝗滿野旱魃連年死賊旣焚掠於郊原客兵復繹騷於城市至蒸爲疫厲相枕死亡有田連數千畝竟妻子相泣餓而死者有委棄田宅變易姓名而逃去者若夫窮民展轉流移不知凡幾稍有金錢率奔走江廣負販以完公家之稅以供八口之需至兩省閉糴而嗷嗷待哺者十死六七矣然遠猶有山寨之可恃近猶有負郭之可資也壬午之年非不雨暘時若而革左五營盤踞四境室廬具爲灰燼堡寨夷爲平壤茅絢耒耜竟屬子虛牛種癘丁都成烏有一二拚命敦耕癡心望穡而穀種纔播餓夫取以充腸禾藁未登悍卒恣其芻秣最可恨者鄉民荷鋤驅犢聞寇退而

歸耕乃離城數里道遇官兵刼牛豕奪衣服稍稍違忤而身首異處且作首功上幕府矣然關廂尚無恙也臣邑十地方城內十之三城外十之七舊秋叛將亂兵將城外民居付之一炬目今營兵五千調防城內鎮兵水陸計五六萬徧布城外大江無舉網之船闐闐絕行人之迹蝸蟻沸羹雖湯火刀砧不足云喻斗大孤城苦之數歲而二三遺黎無夜不守塚無日不養兵皮骨僅存膏髓盡竭譬如大樹枝葉皆披精液都罄雖未顛仆有立而槁耳伏思賦隨田出田蕪而賦從何生城賴人存人亡而城誰與守懇乞皇上俯念皖地繫畱都上游懷寧屬兵燹餘息將本年漕米得與江北殘破諸縣一體議蠲議緩則蘇窮民正

所以拯殘邑拯殘邑卽所以保全疆也不報甲申闖賊陷京師兩次投繯皆爲家人救不死尋薙髮爲僧遯浣花庵間道南還鼎革以來兩臺薦辟皆不就謝以詩曰山僧久卸朝天路只整威儀拜法王又託於老病貧作不入城市說林居西郊外鴨兒塘側與菜傭雜處僅一僮童晝謀生於市室如斗大客至促膝而坐自擎茶進客終歲不窺門門外委土成培塿高數尺許性嗜讀書老而不倦凡作詩文多自焚其草謂身將隱矣焉用文也年八十以微疾終嘗居甌山人稱爲甌山人

顏浩字直生崇禎丙子舉人任南陵教諭鼎革初築室石塘彈棋賦詩所往來皆山樵野漁赤髭白足泯然混跡以終

清阮濬字季子幼宕逸不羈攻苦嗜學城潰後築室龍山讀書
縱酒冬夏惟披一衲因自號焉工詩畫得酒卽豪時攜襍被酒
鑪畫具命一樵童肩之以隨遇勝地卽淹留不返嘗謂友人劉
鴻儀曰我死瘞於草堂之側卽磨一片石題曰嗚呼此飲者阮
子一衲之墓足矣未幾卒鴻儀葬之如約且顏其居曰一衲庵
所著詩多寒瘦畫亦清絕每歲晏鴻儀攜隻雞絮酒以澆其墓
且爲詩弔之曰酬君君不知去去復回顧一片紙錢灰飛上梅
花樹

汪之順字禹行年十二補諸生有聲乙酉後棄舉子業歸隱梅
湖學者稱梅湖先生爲人多技能尤長於詩值國變寓思沈痛
而時出之以冲澹詩境在陶杜之間有梅湖詩刪若干卷櫟園
周亮工燈巖文德翼爲之序桐城姚鼐稱其詩清韻悠邈如輕
霞薄雲依空映日不必廣博而塵埃濁翳無纖毫可入亦足想
見其胸次高潔殆類陶云

范又蠡字小范諸生嗜古耽奇寄情騷雅乙酉後棄舉子業遠
遊酣嬉淋漓所至輒多吟咏晚隱漳湖偃臥菰蘆中罕入城市
著有釣吟集

許雯字幼仲一字飲素隱處南嶺號南園先生詩酒自娛足不
入郭者數十年與汪梅湖之順范五湖又蠡相友善二人者過
城輒訪雯爲掃門沽酒三老翁脫帽高談終日婆娑花下梅湖

年未六十而歿五湖歿年七十餘妻自失二人漠無所向數年死芻茹穎爲詩哭之曰嗚呼許飲素五湖身死有好兒多才能畫兼能詩梅湖老灑西河淚墳墓穉孫尙守之先生身後何所有血痕竹上啼孀婦藏書萬卷付阿誰我向墳頭一澆酒

鄧石如字完白少任俠虬髯攢戟目閃閃如電嗜酒工書篆刻饒古趣以秦漢奇字傾一世酒酣落墨自睨其字贊曰何處讓冰斯人求之則大喜輒持以贈弗可其意者雖貴盛不能得片楮也嘗一筇一笠肩襍被日孤行百里自號笈遊道人捫岱嶧古碑住山中旬月而返登匡廬絕境蛇行猿掛糧絕餓八日茹草木實得不死遊黃山踏徧三十六峯雲海奇幻盡得其變見

黃山石秀詭者輒拾而藏之纍纍貯兩巨囊擔而歸足破肩腫揚揚有喜色又氣剛力健能伏百人客楚時有羣匪聚踞僧舍僧不能制偶夜半僧應門緩匪怒捶僧石如起救僧一匪前鬥石如石如拳至輒踣衆匪齊進又連踣十數人遂大駭竄去石如每被酒必述前事自豪也袁郎中廷極嘗贈石如鶴二其一鶴死一鶴寄豢集賢律院偶爲某太守取去石如走書告太守鶴本某公家物今歸之山人公不得妄取也太守驚謝山人言是命還鶴山人石如篆籀八分書尤爲曹竹墟文植朱石君珪秦端厓潮諸公所重同時善古體書者稱伊墨卿秉綬桂未谷馥俱自以不及石如金殿撰榜亦謂石如能以鍾王腕力運史

籀體製千數百年以來一人而已

江以上道
爾維分
纂光志

懷寧縣志

卷二十一 隱逸

六